

Uunga siunnersuut: Nioqutissanik eqqussinermi akitsuut pillugu Inatsisartut inatsisaata nr. xx af xx. xxx 2019-imeersoq allangornissaanut aammalu qamutit motorillit akileraarutaat pillugit Inatsisartut inatsisaata nr. xx af xx. xxx 2019-imeersup allangortinneqarnera pillugu siunnersuut.

(Aningaasaqarnermut Nunanilu Avannarlerni suleqatigiinnermut Naalackersuisoq)

Saqqummiussissut

(Aningaasaqarnermut Nunanilu Avannarlerni suleqatigiinnermut Naalackersuisoq)

Siullermeerneqarnera

Naalackersuisut sinnerlugit nioqutissanik eqqussinermi akitsuut pillugu inatsisartut inatsisaata allangortinneqarnissaanut siunnersuut, kiisalu qamutit motorillit akileraarutaat pillugit Inatsisartut inatsisaata allangortinneqarnera pillugu siunnersuutit saqqummiutissavakka.

Siunnersuutit tamarmik aningaasaqarnermut inatsisip 2020-mi isumaqatigiissutigineranik tungaveqarput.

Siunnersuutit akitsuummik apaanermik qaffaanermillu imaqarput. Akitsuummik appaanermi qamuterallannut ATV-nullu eqqussinermik akitsuutit atorunnaarsinnisaanut, kiisalu ATV-nut qamutit motorillit akitsuutaat apparnissaanut ilaapput. Appaanerit 2021-mit atuutilissapput.

Akitsuutinik qaffaanermut tupa imigassallu aalakoornartullit ilaapput, kisianni aamma sukut mamakujuttullu ilaallutik. Taakkulu saniatigut puussiat plastikkit eqqussinermi akitsuuserneqassapput ussassaarutillu inoqutigiinnut agguanneqartartut akitsuuserneqassallutik. Qamutit motorillit innaallagissartortut plug-in hybridbiilillu aammattaaq akitsuuserneqassapput, ukiumullu akileraarut minnerpaamik 6.554 kr.-nik akileraarusertassallutik.

Ataatsimut isigalugit innuttaasut peqqissusaannut avatangiisittalu mianernartup pitsanngorsarnissaanut ilaassallutik. Tupamut imigassanullu aalakoornartortalinnut akitsuutit 2007-imili allangornikuunngillat. Piffissallu ingerlanerani ulluinnarni nioqutissanut akit 20 pct.-imik qaffassimallutik. Aningaasaqarnermut inatsimmi isumaqatigiissummut peqataasut aningaasaqarnermut inatsimmi isumaqatigiissutikkut inooriaaseq peqqinnartoq siuarsarusuppaat, soorlu tupa imigassallu aalakoornartut suknullu akitsuutaannik naleqqussaannermi, angorusullugu. Akileraarutit tulluarsarneqartarneri aningaasarsionnemi siuariartorneq malillugu naliginnaavoq. Akileraarutit qaffaanerup tunisassianik atuinerup appaanissaanik kinguneqarnissaa ilimagineqarsinnaavoq, malitsigisaanillu aningaasanik siunertanut allanut atuisoqarsinnaalissalluni, siunertanullu soorlu inuiaqatigiit ataavartumik

siuariarnissaanut, kiisalu politikkikkut siunissaq ungasinnerusoq eqqarsaatigalugu anguniakkat anguniarnerinut, peqataassalluni.

Qamuterallannut ATV-nullu akitsuummik atorunnaarsitsineq, qamutit motorillit innaallagiartortut plug-in hybrid biilinullu akitsuut pillugu siunnersuut aalajangiiffigisassatut siunnersuutini marlunni, immikkoortoq UPA 2019/54-imi aamma 135-mi oqaluuserineqartuni tunngaveqartutut isigineqassapput. UPA 2019/54 ATV-nik qamuterallannullu eqqussinermi akitsuutaarunnissaanut tunngavoq, UPA 2019/135-lu ATV-it il.il. ukiumut akitsuutaat 2.000 kr.-nik appartinnissaanut tunngalluni.

Naggasiullugu inatsisissatut siunnersuutit oqaaseqaatillu innersuussutigissavakka.

Taamatut oqaaseqarlunga Naalakkersuisut sinnerlugit siunnersuutit Inatsisartuni suliassanngortippakka.